

KATRIYÈM PATI

Priyè krétyin-an

DÉZIÈM SÉKSION

Priyè Granmèt-la : « Papa-nou ! »

2759 « Rivé, pandan Jézu té yon koté, li t-ap priyé ; kon-l té sispann, youn nan disip li-yo té di-l : “Granmèt, aprann nou priyé, tankou Jan té aprann disip li-yo” » (Lc 11, 1). Granmèt-la, antan-l réponn demann sa-a, té konfié disip li-yo épi l’Égliz li-a priyé ki fondamantal pou krétyin-an. Sin Luk prezanté yon tèks kout (sink demann : cf. Lc 11, 2-4), sin Matié bay yon vèsion pi dévlopé (sèt demann : cf. Mt 6, 9-13). Sé tèks sin Matié-a tradision litijik l’Égliz-la kinbé (Mt 6, 9-13).

Papa nou ki nan sièl-yo :
 sé pou yo réspékté non-ou ;
 sé pou yo rékonèt sé ou ki roua ;
 sé pou volonté-ou fèt,
 sou tè-a tankou nan sièl-la.
 Pin nou bézouin chak jou-a, ba nou li jodi-a ;
 padonnin nou sa nou fè-ou,
 tankou nou padonnin moun ki fè nou kichòy ;
 pa kité nou pran nan pièj ;
 min délivré nou anba sa ki Mal.

2760 Byin vit, pratik litijik-la té fini Priyè Granmèt-la ak yon louanj
 2855 (doksoloji). Nan Didakè-a (Didachè 8, 2) : « Paské sé pou ou puisans-la ak gloua-a pou tout tan ». Liv Konstitision apostolik-yo (Les Constitutions apostoliques, 7, 24, 1) ajouté o kòmansman « rouayòm-nan », épi sé fòmul sa-a yo konsèvé jous jodi-a nan priyè ékuménik-la. Tradision bizantin-an ajouté après « gloua »-a « Papa-a ak Pitit-la ak Éspri-Sin-an ». Misèl Romin-an déplouayé dènié demann-nan (cf. Embolisme) nan pèspèktiv tann n-ap tann kontantman éspérans ki sin-an (Tt 2, 13) épi

2854 Avènman Jézu-Kri Granmèt nou-an, apré sa gin aklamasyon asanblé-a ki suiv oubyin ki rézime louanj (doksoloji) Konstitisyon apostolik-yo.

ATIK 1

« *Abréjé tout Évanjil-la* »

2761 « Priyè Granmèt-la réyèlman vré gin yon abréjé tout Évanjil-la » ladan-l (Tertullien, or. 1). Granmèt-la, « apré li fin transmèt disiplin pou priyé-a, li di *mandé épi n-ap jouinn* (Lc 11, 9), épi gin sa chak moun mandé dapré chak sikonstans-yo, antan li mété anvan sa-k léjitim épi ki òdinè pou priyè-a tankou fondman pou rivé jouinn sa yo anvi-yo, li gin doua konstoui sou li lòt démann » (Tertullien, or. 10).

I. Nan pouin santral Sint-Ékritu-yo

2762 Apré-l fin montré kòman psòm-yo sé nouritu prinsipal priyè krétyin-an épi kijan yo vîn koulé nan démann « Papa-nou »-an, sint Ogustin di kòm konklizyon :

« Si-ou travèsé tout priyè ki nan Paròl ki sin-yo, dapré sa-m kalkilé, ou pap jouinn anyin Priyè Granmèt-la pa gin ladan-l épi li pa sèvi-l konklizyon » (ep. 130, 12, 22 : PL 33, 502).

2763 Tout Sint-Ékritu-yo (Laloua-a, Profèt-yo épi Psòm-yo) akonpli nan
102 Kris-la (cf. Lc 24, 44). Évanjil-la sé « Bòn nouvèl » sa-a. Sin Matié rézime premié anons-li nan Prèch sou mòn-nan (cf. Mt 5-7). Priyè « Papa-nou »-an nan kè anons sa-a. Sé nan kontèks sa-a chak démann priyè Granmèt-la kité-a vîn kléré :

2541 « Priyè Granmèt-la gin tout pèfeksion nèt [...]. Nan priyè Granmèt-la non sèlman yo mandé tout sa nou kapab dézire ki kòrèk, min tou nan lòd dapré jan yo doué dézire yo-a : konsa, Priyè sa-a pa sèlman aprann nou mandé, min tou li bay tout santiman-nou fòm pou yo ginyin-an » (S. Thomas d'A., s. th. 2-2, 83, 9).

2764 Prèch sou mòn-nan sé yon ansègnman lavi, Priyè Granmèt-la sé yon
1965 priyè, min nan toulèdé Éspri Granmèt-la bay dézi nou-yo yon nouvo fòm, dézi sa-yo ki mouvman sou paranndan k-ap animé lavi-nou. Ak paròl li-
1969 yo Jézu ap anségné nou nouvo lavi sa-a épi l-ap instrui nou pou nou mandé-l nan priyè-a. Kalité lavi-nou nan Jézu dépann dé douati priyè nou-an.

II. « Priyè Granmèt-la »

- 2765 Éksprèsiyon tradisionèl-la « Priyè Granmèt-la » (« Priyè dominikal »)
 2701 vlé di priyè nou adrésé bay Papa nou-an, sa Granmèt Jézu té aprann nou
 épi té ba nou-an. Priyè sa-a, ki vîn sot nan Jézu pou nou, vrèman pa gin
 tankou-l : sé afè « Granmèt-la ». Sou yon bò, ak paròl priyè sa-a, sèl Pitit-
 la réyèlman ba nou paròl Papa-a té ba li (cf. Jn 17, 7) : Sé li minm ki mèt
 pou aprann nou priyé-a. Sou yon lòt bò, Paròl-la ki tounin chè-a, nan kè-l
 ginyin kòm moun-nan, li konnin bézouin frè ak sè-l yo ki moun parèy li,
 épi li révéle yo ba nou : li sé modèl priyè nou-an.
- 2766 Min Jézu pa kite yon fòmou pou nou répété tankou yon machîn (cf. Mt
 6, 7 ; 1 R 18, 26-29). Minm jan ak pou tout priyè vokal, palintèmédiè
 Paròl Bondié-a, Éspri-Sin-an ap aprann pitit Bondié-yo priyé. Jézu pa
 sèlman ba nou paròl pou nou priyé tankou pitit, min an minm tan li ba nou
 Éspri-a pou paròl sa-yo tounin « éspri [...] épi lavi » nan nou (Jn 6, 63).
 Plis ankò, rézon épi posibilité priyè n-ap fè tankou pitit-la sé poutèt Papa-
 a « voyé Éspri Pitit li-a nan kè nou, l-ap rélé : “Aba, Papa !” » (Ga 4, 6).
 Paské priyè nou-an sé intèprèt sa nou anvi-yo dévan Papa-a, li-minm tou
 « k-ap sondé kè-yo », Papa-a, « li konnin sa Éspri-a anvi-a, paské sé dapré
 690 Bondié li priyé pou sin-yo » (Rm 8, 27). Priyè nou dirijé bay Papa-a antré
 nan sékrè mision Pitit-la épi Éspri-a.

III. Priyè l'Égliz-la

- 2767 L'Égliz-la té résévoua paròl-yo Granmèt-la fè nou kado-a ki pa kapab
 séparé ak Éspri-Sin-an k-ap ba yo lavi nan kè fidèl-yo, dépi nan
 kòmansman-l épi li té ékspérimanté-l nan lavi-l. Prémie kominoté-yo té
 konn fè Priyè Granmèt-la « toua foua pa jou » (Didaché 8, 3), nan plas
 « Dizuit bénédiksiyon-yo » piété juif-la té konn anplouayé-a.
- 2768 Dapré Tradision apostolik-la, Priyè Granmèt-la anrasiné ésansièlman
 nan priyè litijik-la.
- Granmèt-la « aprann nou pou nou fè priyè an komin pou frè nou-yo.
 Réyèlman li pa di, *Papa mouin*, ki nan sièl-yo ; min, *Papa nou*, pou nou fè
 siplikasyon pou tout kò-a ansanm » (S. Jean Chrysostome, hom. in Mt. 19, 4 :
 PG 57, 278D).
- Nan tout tradision litijik-yo, Priyè Granmèt-la sé yon pati intégral nan
 gran Lè Ofis divin-an. Min karaktè éklésial li-a sé sitou nan toua
 sakrèman inisiation krétyin-an yo parèt yon fason klè :
- 2769 Nan *Batèm*-nan épi nan *Konfirmasion*-an, lè yo *rinmèt* (*traditio*) Priyè
 1243 Granmèt-la, sa indiké nouvo nésans pou lavi Bondié-a. Paské priyè
 krétyin-an sé palé ak Bondié avèk Paròl Bondié-a li-minm minm, moun ki
 « réfèt [...] gras a paròl Bondié ki vivan-an » (1 P 1, 23) aprann invoké

Papa yo-a ak sèl Paròl li toujou kouté-a. Épi apati lè sa-a yo kapab fè sa paské mak so Onksion Éspri-Sin-an pozé yon fason ki pa kapab éfasé sou kè-yo, sou zòrèy yo, sou po bouch-yo, sou tout réalité yo tankou pitit. Sé sa-k fè, laplipa kòmantè Pèr-yo osijè priyè « Papa-nou »-an yo adrésé bay katékumèn-yo (moun k-ap préparé pou résévoua batèm-nan) ak néofit-yo (moun ki fèk vîn krétyin-yo). Lè l'Égliz-la ap fè Priyè Granmèt-la, sé toujou pèp « ti bébé ki fèk fèt »-yo k-ap priyé-l épi ki jouinn mizérikòd (cf. 1 P 2, 1-10).

- 2770
1350 Nan *litiji ékaristik*-la, Priyè Granmèt-la parèt tankou priyè tout l'Égliz-la. Sé la signifikasyon-l révéle anplin épi éfikasité-l tou. Yo mété-l ant Anafò-a (Anaphore : Priyè ékaristik-la) épi litiji Kominion-an, sou yon bò li rézimé tout démann-yo épi intèsésion yo éksprimé nan mouvman Épiklèz-la, épi, sou yon lòt bò, li frapé nan pòt Résépsion Rouayòm-nan, sa Kominion nan sakréman-an pral antispé-a.
- 2771
1403 Nan Ékaristi-a, Priyè Granmèt-la manifésté karaktè *eskatolojik* démann li-yo (sètadi ki konsèné dènié tan-yo lè Kris-la ap tounin-an). Li sé priyè ki korésponn ak « dènié tan-yo », tan salu-a ki kòmansé ak vidé yo vidé Éspri-Sin-an é k-ap fini lè Granmèt-la rétonin. Démann yo adrésé bay Papa nou-an, kontrèman ak priyè Ansyin Alians-la, yo apuiyé sou mistè salu-a ki déja akonpli, yon sèl foua pou tout tan, nan Kris-la ki krisifié épi ki résisité-a.
- 2772
1820 Sé nan lafoua sa-a ki pa kapab kasé-a éspérans ki soutni chak nan sèt démann-yo soti. Y-ap éksprimé jémisman tan kounié-a, tan pasians-la épi atant-la koté « sa n-ap yé-a pa ko parèt » (1 Jn 3, 2 ; cf. Col 3, 4). Ékaristi-a épi « Papa-nou »-an ap tann Avènman Granmèt-la, « joutan li vini » (1 Co 11, 26).

RÉZIMÉ

- 2773 *Antan Jézu ap réponn démann disip li-yo (« Granmèt aprann nou priyé » : Lc 11, 1), li rinmèt yo priyè fondamantal krétyin-an « Papa-nou »-an.*
- 2774 *« Réyéلمان vré, Priyè [Granmèt-la] gin abréjé tout Évanjil-la » ladan-l (Tertullien, or. 1), « sé priyè ki gin plis pèfèksion-an » (S. Thomas d'A., s. th. 2-2, 83, 9). Li nan pouin santral Sint-Ékritu-yo.*
- 2775 *Yo rélé-l « Priyè Granmèt-la » paské li vîn jouinn nou sot nan Granmèt Jézu, li-minm ki Mèt épi modèl priyè nou-an.*
- 2776 *Priyè Granmèt-la sé priyè l'Égliz-la ki dépasé lòt-yo. Sé yon pati intégral nan gran Lè Ofis divin-an épi nan sakréman inisiasion krétyin-yo : Batèm, Konfirmasion épi Ékaristi-a. Antan li anndan*

Ékaristi-a, li manifésté karaktè « éskatolijik » démann li-yo, nan tann Granmèt-la, « joustan li vini » (1 Co 11, 26).

[◀Atik
anvan-an](#)

[Gid jénéral-la](#)

[Atik▶
apré-a](#)